

**ФАН
ҲАҚИДА
СУҲБАТ
ЛАР**

Ш. ПИДАЕВ

**ТАНГАЛАР—
ДАВР КЎЗГУСИ**



ТОШКЕНТ
«ЎЗБЕКИСТОН»
1984

**63.2
П 39**

Тақризчилар — тарих фанлари доктори У. И. Исломов,
тарих фанлари кандидати М. Исомиддинов.

Пидаев Ш.

П 39 Тангалар — давр кўзгуси.— Т.: Ўзбекистон,
1984.— 23 б., расм.— (Фан ҳақида суҳбатлар.)

Рисолада қадимий тангалар ва уларниң маданият, санъат тарихини, ўтмиш воқеликни ўрганишдаги аҳамияти тўғрисида фикр юритилади. Мавзу ўрта Осиёда биринчи бўлиб танга зарб қилган қадимги Бақтрия, шунингдек ўрта Осиё, қадимги Рим ва Греция териториясида муомалада бўлган тангалар мисолида ёритилган.

Рисола тарих, археология, санъат тарихига қизиқувчи китобхонларга мўлжалланган.

Пидаев Ш. Монеты — зеркало эпохи.

**ББК 63.2
902.9**

№ 52—84
Навоий номли ЎзССР
Давлат кутубхонаси.

**П 0507000000—61 84
М 351 (04) 84**

© «ЎЗБЕКИСТОН» нашриёти, 1984 й.

Нумизматика танга пуллар ҳақидаги фандир. У юонча «номизма» сўзидан олинган бўлиб, танга маъносини билдиради. Бу термин ўрта асрдан эътиборан ишлатила бошланди. Танга пуллар билан шуғулланувчи мутахассисларнинг пайдо бўлиши ҳам шу даврга тўғри келади. Улар ўзларини нумизматлар деб атай бошладилар.

Нумизматлар тангалардаги расмларни (тип), ёзувларни (изоҳларни), уларнинг оғирлиги, ўлчами, металл сифатини, ким томонидан зарб этилганлиги, қачон ва қаерда муомалада бўлганлиги ва ҳоказоларни ҳар томонлама ўрганадилар. Нумизматик изланиш асосида тангалардан тарих ва маданият билан боғлиқ бўлган маълумотларни максимал даражада олиш вазифаси ётади.

Инсоният тарихи ва маданиятини ўрганишда тангаларнинг аҳамияти катта. Чунки улардан олинадиган маълумотлар шунчалик кўп қирралики, уларнинг ҳаммасини ҳаттоки қайд қилиб чиқиш қийин. Хусусан, тангалар тарих, сиёсий иқтисод, санъатшунослик, идеология, тил, меъморчилик, савдо, халқаро алоқалар вужудга келиши билан боғлиқ бўлган бир қанча муаммоларни ечишда моддий манбалар орасида муҳим роль ўйнайди. Тангалар бўлиб ўтган тарихий воқеаларнинг санаси, қандай шоҳлар ҳукмронлик қилганлигини, уларнинг ҳукмронлиги неча йил давом этганлигини, давлат чегараларини аниқлашда, табнат, қишлоқ хўжалиги, қадимги металлургия, қурол-яроғлар тарихини, кийимбуш формаларини ўрганишда ҳам катта аҳамиятга эга. Археологик қазишлар давомида топилаётган иморатлар, қабрлар, маданий қатламлар ва, қолаверса, турли

археологик топилмаларнинг «ёшини» аниқлашда археологлар кўпинча тангаларга асосланишини қайд қилсак, уларнинг фан олдидаги аҳамияти нақадар катта эканлиги. Яққол намоён бўлади.

ТАНГАЛАРНИНГ ПАЙДО БЎЛИШ САБАБЛАРИ

Инсоният тарихига назар ташлар эканмиз, одамлар орасида турли нарсалар айирбошлаш қадимги тош давридаёқ пайдо бўлганлигининг шоҳиди бўламиз. Аввал қабила ичида, маълум вақт ўтиши билан қабилялараро айирбошлаш пайдо бўлган. Йиллар, асрлар ўтиши билан айирбошлаш учун мўлжалланган молларнинг хиллари кўпайиб борган. Ниҳоят жамият тараққиётининг маълум босқичида айирбошлаш ўртада воситачи товарнинг пайдо бўлишини тақозо қила бошлади. Бу воситачи товар бошқа ҳамма мол-товарларнинг эквиваленти бўлиши керак эди. Шундай қилиб, энди айирбошлаш учун ажратилган моллар воситачи товарнинг қиймати билан аниқланадиган бўлди. Бу воситачи товарлар одамлар билган биринчи пул эди. Пулнинг пайдо бўлиши айирбошлаш олди-сотдига айланганлигидан, савдо вужудга келганлигидан далолат берди.

Воситачи товар, яъни пулнинг ролини турли халқларда турли моллар бажарган, лекин бу товарлар, асосан, инсон ҳаётида энг зарур ҳисобланган моллар бўлган. Масалан, деҳқончилик билан шуғулланувчи қабилялар орасида пул ўрнини деҳқончилик маҳсулотлари босган бўлса, овчилик билан шуғулланувчи қабилялар орасида тери шундай ролни ўтаган. Чорвачилик билан машғул бўлган қабилялар орасида эса пул хизматини қорамоллар бажарган.

Оснё ва Африканинг кўпгина халқлари орасида яқин вақтларгача чиганоқ, ит тиши, тошболта, мунчоқ ва ҳоказолар пул ролини бажарган. Масалан, Ҳиндистонда марваридлар пул ўрнига ўтган. Янги Гвинеяда эса тошболтадан пул ўрнида фойдаланганлар. Бундай мисолларни кўплаб келтириш мумкин. Умуман, оддий чиганоқдан тортиб, то одамларнинг бош суюгигача пул вазифасини бажарганлигининг шоҳиди бўламиз. Шундай бўлса-да, кўп халқлар орасида қорамолларда ифодаланган пул формаси кенг тарқалган. Бозорга олиб чиқилган товарларнинг нархи қўй ва ҳўқиз билан баҳолangan. Масалан, бир бош қўй бешта ҳўқиз терисига, ўнта сопол идиш ёки бўлмаса ярим қоп арпага тенг

бўлиши мумкин, яъни ҳамма нарса қўйга нисбатан ба-
ҳоланганд. Агар деҳқон ярим қоп арпани бозорга олиб
чиқиб алиштироқчи бўлса, унга ўнта сопол идиш оли-
ши мумкин бўлган.

Бундай пуллар жамият тараққиётининг маълум бос-
қичларида ўзини оқлади. Аммо вақт ўтиши билан улар
давр талабига жавоб беролмай қолди. Чунки бу пул-
ларда ифодаланган қийматлар нисбий қиймат эди.
Улардан фойдаланишда қатор қийинчиликлар бор эди.
Шунинг учун муомалада янада қулай бўлган юқори
қийматли, осон бўлинадиган товар-пулга эҳтиёж туғила
бошлади. Бундай пул узоқ вақт изланди ва ниҳоят
одамлар шундай пул сифатида металларни танладилар.
Чунки металл пулларни узоқ сақлаш мумкин, уни ки-
чик бўлакларга бўлиш, ундан арzon қийматли металл
ём билар олиш мумкин. Улар кўп жой эгалламаган,
олиб юриш ҳам осон бўлган ва ҳоказо. Металл пуллар
орасида, аниқса, олтин ва кумуш пул жуда қадрлан-
ган. Металл пуллар текширишларга қараганда қадим-
ги дунё давлатларида, масалан, Миср ва Месопотамия-
да милоддан олдинги III мингинчи йилларда ёқ пайдо
бўлган экан.

Бу металл ём билар эди. Лекин ҳамма пуллар ҳам
металл ёми шаклида бўлмаган. Масалан, Мисрда пул-
ни симга ўхшатиб, мис, кумуш ва олтиндан тайёрлаган-
лар. Бу симларни улар билакузукга ўхшатиб эгганлар
ва қўлларида тақиб юрганлар. Қадимги Хитойда пул-
ларни бронза пичноқларга ўхшатиб тайёрлаганлар. Қа-
димги Римда эса қадимги Грециядаги каби маълум
офириликдаги металл ём билар пул хизматини ўтаган.

Умуман ҳамма металл пуллар офирилигига қараб
қийматланган. Энг катта офирилик бирлигини талант
деб атаганлар. Бир шоҳ талант 60,4 кг, катта та-
лант — 50,4 кг, кичик талант 30,2 кг олтинга тенг бўл-
ган. Талантлар миналарга бўлинган. Шоҳ талантни 60
минага тенг бўлган. Бир минанинг офирилиги I кг дан
ортиқроқ бўлган.

Аммо металл пулларнинг ҳам ўзига хос қийинчилик-
лари бор эди. Масалан, олтин ва кумушга бошқа бирон
арzon метални аралаштириб пул тайёрлаш мумкин.
Унинг соғ олтин ёки кумушлигини кўз билан аниқлаб
бўлмайди-ку? Бундан ташқари ём билардан озгина-озги-
на арралаб олиш ҳам мумкин. Демак, бу ём биларнинг
офирилигини ва сифатини ҳар доим текшириб бориш
зарур бўлган. Шунинг учун ём биларнинг офирилигини

ўлчаш учун одамлар тарози олиб юришга мажбур бўлганлар. Металлнинг соғлигини қандай текшириш мумкин? Вақт ўтиши билан бунинг иложи ҳам топилди. Энди давлатлар маълум оғирликдаги ва қийматдаги маҳсус муҳр босилган металл ём биларни чиқара бошлади. Танга пуллар шундай қилиб пайдо бўлди.

ТАНГА НИМА ВА У ҚАНДАЙ ЗАРБ ҚИЛИНГАН!

Маълумки, танганинг икки: олд (аверс) ва орқа (реверс) томони бор. Танганинг ҳар иккала томонига ҳам расмлар ва ёзувлар туширилган бўлади. Расм ва ёзувлар тасвирланган майдон «танга майдони» деб аталади. Одатда танга майдони чизиқли, нуқтали ёки чизиқ ва нуқтали, ё бўлмаса узун мунҷоққа ўхшаш ҳошия билан ўралган бўлади. Танга қирраси «гурт» деб аталади.

Тангада тасвирланган расмлар ва ёзувлар танга типининг асосини ташкил этади. Расм ва ёзувлар мазкур тангани зарб этган давлат, қироллик, хонлик ёки шаҳарнинг ўзига хос муҳридир. Бу билан шоҳ, қирол, хон ёки шаҳар ҳокими бозорга муомалага чиқарилаетган тангалар ҳақиқий ва тўла қийматли эканлигини таъкидлайди ва бунга кафиллик берган ҳисобланади. Чунки танга-металл. Унинг соғлиги ва оғирлиги давлат томонидан кафилланиши керак. Бу ҳар қандай фирибгарликни, қалбаки пул ясашни чеклаш мақсадида қилинган. Шундай қилиб, танга деганда биз маълум расм тасвирланган муайян оғирликдаги ва сифатдаги метални, предметни тушунишимиз керак. Иқтисодчиларнинг тили билан айтганда: «Товарларнинг товари, бошқа товарларнинг ҳаммасини ўз ичига пинҳон қилиб олган товар, истаган бир вақтда кўнгил тусаган ва орзу қилган ҳар қандай буюмга айланна оловчи сеҳрли восита ихтиро қилинган эди»¹.

Танга, яъни «монета» сўзининг ўзи эса тангалардан бир неча аср кейин пайдо бўлган. Бу сўз римликларнинг Юнона исемли маъбудасининг лақаби бўлиб, «эҳтиёт қилувчи маъбуда» деган маънони билдиради. Маъбудани одатда римликлар Юнона Монета деб аташган. Унинг шарафига Римнинг энг баланд ерида, Капи-

¹ К. Маркс, Ф. Энгельс. Танланган асарлар, 2-т., Тошкент, 1959, 331-бет.

толияда ибодатхона қурилган бўлиб, бу ерда танга зарб қиласиган устахона жойлашган. Шунинг учун ҳам маъбуда Юнона Монета ва тангалар зарб қиласиган устахона шарафига тангаларни «монета» деб атай бошлигандар. Ҳатто «монета» сўзини тангаларнинг ўзида ҳам қайд қилганлар. Ҳусусан милоддан олдинги I асрнинг ўрталарида Рим магистрати — Тита Каризия номидан зарб қилинган тангаларнинг олд томонидан Юнона маъбудасининг расми ва «монета» сўзини кўриш мумкин. Қейинчалик бу сўз бошқа халқларга ҳам ёйилиб кетди ва шу тариқа металл пулларни кўп жойларда монета деб атайди.

Тангаларнинг олд томонида одатда ҳоким, шоҳ ёки император, ё бўлмаса бирор бир муқаддас ҳайвон, орқа томонида эса бирорта маъбуда ёки бошқа бир нарса, ёзувлар ва тамфа тасвирланган бўлади. Ўрта асрлардаги Шарқ мамлакатларининг тангаларида расмлар тасвирлаш мумкин бўлмагани учун расм ўрнига ҳам ёзувлар зарб қилинган. Бу тангаларнинг олд томонида Қуръондан оят, қачон ва қаерда зарб қилингани қайд қилинган. Танганинг орқа томонида оятнинг давоми, худонинг ердаги ноиби — Муҳаммад, халифанинг исми ва сўнгра амирнинг ёки мазкур тангани зарб қилдираётган ҳокимнинг исми келтирилган.

Дастлабки даврларда танга зарб қилиш учун эритилган маълум оғирликдаги металлни ичига расм ўйилган маҳсус сандонга солиб, унинг устига яхлит металл стержень қўйилган ва стерженга оғир болға билан урилган. Натижада танганинг бир томонига сандондаги расмнинг тасвири тушган, танганинг иккинчи томони эса бир оз чуқур бўлиб қилган. Тангани бир уришда зарб қилиш лозим бўлган. Агар унга икки ёки уч марта урилса, расм чаплашиб кетган ва бозор учун яроқсиз бўлиб қолган.

Вақт ўтиши билан танга зарб қилувчи асбоблар ҳам такомиллашиб борди. Энди сандон устига қўйиладиган стерженинг ички томонига ҳам маълум шакл қиритилиб, унда расм тасвири ўйиладиган бўлди, яъни у штемпелга — ўзига хос қолипга айланди. Шундай қилиб, танганинг икки томонига ҳам расмнинг тасвирини тушириш имконияти яратилди. Тангаларда расмлардан ташқари ёзувлар ҳам пайдо бўла бошлиди. Бу ерда шуни эсдан чиқармаслик керакки, сандонда ҳам, қолипда ҳам ҳақиқий расмнинг тескари акси ўйиб ишланган бўлади. Шундай қилингандагина тангада тасвирланаёт-

ган расмнинг ўзи чиқади. Сандон ва қолип одатда у замонларда темир ёки бронзадан тайёрланган. Қолипнинг ихтиро қилинниши танга зарб қилишни анча тезлаштирди, сифатини оширди, танга зарб қилувчи рассом — кандакорлар эса тангаларда мураккаб расмларни тасвирилаш имкониятига эга бўлдилар. Расмларни янада реал ва ҳаётий қилиб тасвирилашга шароит туғилди. Антик даврга оид танга зарб қиладиган асбобларнинг тасвирини ўша даврга оид тангаларда кўришимиз мумкин. Масалан, Рим магистрати Тита Каизия номидан зарб қилинган тангаларнинг орқа томонида қиздирилган металлни ушлаш учун мўлжалланган омбир, тўғри тўртбурчак шаклидаги баланд сандон, болға тасвириланган.

Одатда қолиплардан фойдаланиб бўлингандан кейин уларни йўқ қилганлар. Қолиплар сохта танга зарб этувчи кишилар қўлига тушиб қолмаслиги учун шундай қилинган. Шунинг учун ҳам бўлса керак, археологлар қазиш пайтида танга зарб қиладиган қолип-асбобларга деярли дуч келмайдилар. У жуда ноёб топилма ҳисобланади.

БИРИНЧИ ТАНГАЛАР

Танга пул зарб этиш қачон ва қаерда биринчи марта ихтиро қилинганилиги ҳақида олимлар орасида яқин вақтларгача яқдиллик йўқ эди. Уларнинг бирлари танга биринчи бўлиб Кичик Осиёда жойлашган Лидия давлатида зарб қилинган деб ҳисобласалар, иккинчилари Эгин оролида жойлашган Аргос подшолигини кўрсатадилар. Ҳозир бу муаммо ҳал қилинган. Танга пулларни биринчи бўлиб ҳақиқатан ҳам милоддан олдинги VII асрда лидияликлар ихтиро қилганлар. Лидияда биринчи бўлиб тангалар зарб қилинганилиги ёзма манбаларда ҳам зикр этилган. Хусусан, буюк юон тарихчи олимлари Геродот ва Ксенофонтлар танга биринчи марта Лидияда пайдо бўлганлигини ва у олтин билан кумушнинг табиий қотишмасидан тайёрланганилигини қайд қиладилар. Бу тангаларнинг бир томонида тулкининг расми тасвириланган, иккинчи томонда тасвир бўлмаган. Тулки лидияликларда муқаддас ҳайвон ҳисобланиб, у уларнинг энг улуғ маъбуласи Бассарайнинг рамзий тасвири бўлган. Бу тангани лидияликлар олтин статер деб атаганлар, «статер»— юонча сўз бўлиб, тарози дастаги деган маънени билдирган.

Лидияликлардан бир неча ўн йилдан кейин Эгинда ҳам танга зарб қила бошлаганлар. Қизиғи шундаки, Эгинда танга зарб этиш мустақил равишда ихтиро этилди. Бунда биз лидияликларнинг таъсирини асло кўрмаймиз. Эгинликлар тангани соф кумушдан зарб қилгандар. Унинг шакли ҳам, ундаги тасвир ҳам лидияликларнидан ўзгача бўлган. Бу тангада тошбақа тасвирланган.

Кўп ўтмай, лидияликлар ва эгинликлар таъсири остида Юнонистоннинг бошқа шаҳарлари, уларнинг Қора денгиз бўйидаги колонияларида, сўнгра Эрон, Рим ва бошқа жойларда танга зарб қила бошладилар. Айни замонда тағаларни зарб этиш усуллари ҳам такомиллашиб борди. Чунки тангаларнинг савдо-сотиқда айирбошлиш воситаси сифатида қулайлиги дарҳол кўзга ташланди. Уларни ҳамма: сотувчи ҳам, харидор ҳам, савдогар ҳам тан олди.

Нима учун биринчи тангалар айнан Лидия ва Эгинда ихтиро қилинди? Гап шундаки, Лидия ва Эгин оролининг қулай географик ўрни савдо-сотиқ бу ерда бошқа шаҳарларга қараганда бир неча асрлар олдин пайдо бўлишига, унинг тез ривожланишига кенг шароитлар яратган эди. Улар Юнонистон шаҳарлари, Қора денгиз бўйида жойлашган грек колониялари, шарқ давлатлари билан савдо олиб борар эдилар. Чакана савдо, айниқса, кучли тараққий қилган эди. Шундай бўлмаганда юонолар лидиялик ва эгинликларни биринчи бўлиб савдогарлар деб атамаган бўлур эдилар. Танга пулларга бўлган зарурият эса, айниқса, мана шу чакана савдо билан шуғулланувчи савдогарлар орасида кучли бўлган. Чунки чакана савдо тангага ўхшаш, муоммалада қулай бўлган пулларнинг пайдо бўлишини тақозо қиласди. Савдогарлар танга пулни ихтиро қилиб, ўз юмушларини жуда енгиллаштирилар. Энди уларга тарози кўтариб юришнинг ҳожати қолмаган эди. Ваҳоланки, бунгача улар қаерга бормасинлар тарози ва қадоқтош кўтариб юришга мажбур эдилар. Тангаларни эса шундай санаб бериш мумкин. Унинг оғирлиги, металлнинг соғлиғи маҳсус расм ва тамға билан давлат томонидан кафилланган эди.

Эронда биринчи марта танга пулларни милоддан олдинги 522—486-йилларда ҳукмронлик қилган шоҳ Доро I зарб қилдирган. Шунинг учун ҳам у зарб қилдирган тангалар дариклар деб аталган. Дариклар соф олтиндан тайёрланган. Унинг оғирлиги 8,4 граммга

тeng. Таңгада камон отаётган шоҳ тасвирланган. Да-риклардан ташқари аҳмонийлар Эронида кумуш тангалар ҳам зарб қилинган. Уни сикл деб аташган. Сиклнинг оғирлиги 5,6 граммга teng бўлган.

Қора денгиз бўйидаги грек колонияларида, масалан, Пантикеїда, Феодосияда, Ольвияда ва бошқа шаҳарларда ҳам тангаларни милоддан олдинги VI асрдан бошлаб зарб қила бошлайдилар. Таңгалардаги расмлар бу шаҳарларга кимлар асос солганини аниқлашга ёрдам беради. Мисол учун Пантикеїда зарб қилинган тангани олайлик. Унинг орқа томонида шер тасвирланган, Милет тангаларида ҳам шер тасвирланган. Демак, Пантикеїга биринчи бўлиб милетликлар асос солган деб ҳисоблаш мумкин. Бу тарихий фактдир.

Бақтрияда биринчи тангаларни Салевкнинг ўғли Антиох зарб қилдирган (милоддан олдинги 293—280 йил). Аммо улар кўп миқдорда чиқарилмаган. Бу ерда кўплаб тангаларни зарб этиш грек-бақтрия подшолиги даврига тўғри келади. Бу тангаларнинг номи юонча бўлган; яъни олтин танга — статер, кумуш тангалар — тетрадрахма, драхма, обол деб аталган. Кўплаб мис тангалар ҳам чиқарилган. Топилмаларга қараганда бу ерда турли қийматдаги кумуш тангалар кўп зарб этилган экан. Таңгаларнинг оғирлиги юонлар тангаларнинг оғирлигига teng бўлган. Хусусан, олтин танга 8,6 граммга, тетрадрахма 16 граммга teng бўлган. 1 статер — 5 тетрадрахмага ёки 20 драхмага teng бўлган.

Сўғдиёнада танга биринчи марта тахминан эрамизнинг бошларида зарб қилинди. Бу кумуш танга бўлиб, унинг олд томонида шоҳ, орқа томонида ёйчи тасвирланган. Таңга жуда кичик ва енгил бўлган (0,3—0,4 грамм атрофида). Бунгача бу ерда грек-бақтрия шоҳларининг тангалари муомалада бўлган.

Чоч (Тошкент) воҳасида ҳам тангалар эрамизнинг биринчи асрларидан бошлаб зарб қилина бошланди. Бу тангалар бронзадан тайёрланган бўлиб, унинг олд томонида шоҳ, орқа томонида тамға ва сўғд ёзуви тасвирланган.

Хоразм ўзининг биринчи тангаларини милоддан олдинги II—I асрларда зарб этди. Бу тангалар грек-бақтрия шоҳларининг тангаларига тақлидан чиқарилган эди. Вақт ўтиши билан Хоразм тангаларининг олд томонида ўзига хос тож кийган шоҳнинг портрети, ор-

қа томонида суворий расми ва ёзувлар пайдо бўлди. Бироқ, умуман олганда Сўғдиёна, Чоч, Хоразм тангаликларнига тенглаша олмаган. Бақтрия тангалари ўша даврда бу ўлкада кандакорлик санъати зўр тараққий қилганлигидан далолат беради.

ТАНГАЛАР — САНЪАТ ДУРДОНАСИ

Милоддан олдинги III—II асрлар Бақтрия маданиятининг энг гуллаб-яшнаган давридир. Бу давр инсониятга шундай машҳур нодир асарларни тақдим этдики, улар ҳозир ҳам ўзининг жилоси билан бизни лол қолдиради. Айниқса, грек-бақтрия заргарларининг кандакорлик санъати эътиборга лойиқдир. Грек-бақтрия заргарлари яратган шоҳ ва маъбуллар образларининг ҳар бирин ўзи бир дунёдир. Бу даврда шоҳларни кўкларга кўтариб мақташ анъана бўлган. Бу мавзу тангаларда, монументал санъатдаги каби, турли тарихий даврларда турлича ифода этилган. Албатта, бунга бир қанча объектив сабаблар бўлган. Авваламбор, мазкур жамиятнинг тараққиёт даражаси, давлат тузуми, мавжуд ижтимоий муносабатлар, аҳолининг этник таркиби, сиёсий, фоявий ва диний эътиқоди ва ҳоказолар санъатнинг шаклланишига турлича таъсир кўрсатган. Зоро, санъат муайян ижтимоий-иқтисодий даврининг мевасидир. Ўша даврдаги грек-бақтрия ҳайкалларига реализм хослигини кўриш мумкин, яъни рассом-кандакорлар ўз замондошларининг портретида уларнинг, биринчи навбатда, ташқи қиёфасини айнан ифода этишга ва, иккинчидан, ички дунёсини очиб беришга ҳаракат қилганинг шоҳиди бўламиз. Албатта, бунда улар маълум қоидаларга риоя қилганлар, хусусан, кандакорлар шоҳ образини тангада ифодалаётганларида унинг шахсиятига тегиб кетмасликка ҳаракат қылганлар. Мисол тариқасида грек-бақтрия шоҳи Евтидемнинг кумуш тангасини олиб кўрайлиқ. Бу шоҳ ўз даврининг устамон, ҳийлакор, моҳир сиёсатдонларидан бири бўлган, у тангаларда мағрур, шафқатсиз, мустаҳкам иродали киши сифатида тасвиirlанган. Евтидем тангаларининг орқа томонида паҳлавон Геракл тасвиirlанган. Шуниси қизиқки, Евтидемнинг ёшлик йиллари тасвиirlанган тангаларда Геракл ҳам ёш, улғайган даври акс эттирилган тангаларда эса Геракл ҳам кексайган ҳолда тасвиirlанган.

Биз рассом-кандакорларнинг юқори даражадаги санъаткор бўлганликларидан далолат берувчи яна бир мисолни кўриб чиқайлик. Бунинг учун Евтидемнинг ўғли Деметрий фармони билан зарб қилингани тангага мурожаат қиласиз. Тарихий манбалардан маълум бўлишича, Деметрий ўз ҳукмронлиги даврида мингдан ортиқ шаҳарга асос солган, шоҳлик территориясини анча кенгайтиришга муяссар бўлган. Жумладан, у Хинди斯顿нинг кўпгина қисмини босиб олган. Деметрий ўз тангаларида филинг бошига ўхшаш бош кийим кийган ҳолда тасвиrlанган. Бу билан у ўз ғалабаларини кенгомма орасида ташвиқот қилмоқчи бўлган. Маълумки, Хинди斯顿 ўша вақтларда ҳам филлар ватани деб атальарди. Бироқ бу ерда биз эътиборингизни бошқа нарсага жалб этмоқчимиз. Агар Евтидемнинг расмини Деметрийнинг расми билан солиштириб кўрадиган бўлсак, улар ўртасидаги ўхшашлик яққол намоён бўлади. Бу ўхшашлик шу даражада яқин ва кучлики, агар хаёлан Евтидем бошига Деметрийнинг бошидаги қалпоқни кийгизсак, у ҳолда бизнинг олдимиизда Евтидем эмас, балки Деметрий тургандек бўлади. Деметрийнинг ҳам ияклари Евтидемнидек оғир, лаблари қаттиқ қисилган, кичик кўзлари ич-ичига ботган. Унинг бурни ҳам катта, бўйни ҳам йўғон.

Умуман Деметрийнинг юзида қандайдир муайян қатъийлик, мағрурлик ва ўз мақсадига эришиш йўлидаги саботлилик ўз ифодасини топган. Бу билан рассом-кандакорлар ота ва ўғил ўртасидаги наслий ўхшашликларни қайд қилмоқчи бўлган бўлсалар керак. Аммо бу ўхшашликни илиб олиш ва ифода этиш ҳар қандай кандакорнинг ҳам қўлидан келавермаган. Бунинг учун катта маҳорат керак. Сўнгги грек-бақтрия шоҳлари Евкратид ва унинг ўғли Гелиокл расмлари ўртасида ҳам наслий ўхшашлик аломатлари кандакорлар томонидан жуда аниқ қайд қилинган. Хусусан, уларнинг лаблари, бурни бир-бирига ўхшашдир. Лекин кўз қийиқлари, пешоналарининг формаси турличадир. Гелиокл ажинли юзлари шишиган, шавқсиз, шубҳали, маъюс боқиб турган ҳолатда тасвиrlанган. Шоҳларнинг портретлари ўртасидаги ўхшашлик қанчалик кўп бўлмасин, ҳар бир шоҳнинг образи — индивидуал ва такрорланмасдир.

Кейинги юдийлар даври санъатида образлилик билан бирга шоҳга хос улуғворлик ва обрўни бўрттириб

кўрсатиш лозим бўлган. Герайнинг портрети бунга яқ-қол мисол бўла олади.

Герай тангаларда шундай тасвирланганки, гўё у жамиятнинг энг юқори поғонасида тургандек, қолганлар эса унинг пойида туриши керакдек, гўё унга тенг келадиган одам инсонлар орасида йўқдек.

Герай портретида эллинизмнинг таъсири айтарли сезилмайди. Лекин у ҳам ўзининг ғоят таъсирчанилиги, яратилаётган образни реал ифода эта олинганилиги билан ажралиб туради. Кандакор унинг ташқи қиёфасини аниқ тасвирлабгина қолмай, балки Герай характерини очиб бера олган. Тангадаги расмда Герай бошини мағрур кўтариб турибди. Кулча юзли, бир оз тўла, қирпра бурун, шоп мўйлов, оғзи кичик, пастки лаби дўрдоқ, ияги сал олдига чиққан, бўйни йўғон, кўзлари катта, пешонаси кенг, олдинги соchlари тўғри, калта, орқага тараалган, чаккаларидаги соchlари эса бирмунча узун ва қулоғини ёпиб турибди. Орқадан тўғри қилиб қирқилган соchlари майин мавж уриб турибди. Эгнида елкаси кенг қирқилган енгил куйлак, устида қайтарма ёқали чопон. Расм нуқта ва чизиқлардан иборат хошия ичида чизилган. Шундай қилиб, тангалар асосида тарихий шахсларнинг ташқи қиёфасини, уларнинг характерини маълум даражада аниқлаш мумкин. Бироқ бу ерда шартлилик борлигини унутмаслик керак. Баъзи ҳолларда шоҳларнинг портретлари ўта муболағали тарзда тасвирланган. Шў боисдан тангаларни ва тарихий ёзма манбаларни бир-бирига жиҳдий чоғиштириш асосида объектив ҳақиқатни аниқлаш даркор.

Бу даврдаги тангалар — ноёб санъат асаридир. Ушбу тангаларнинг қолипларини тайёрлаган рассом-кандалакорни ҳақиқий санъаткор дейиш мумкин. Чунки улар олдин санъатда маълум бўлмаган ҳаётий ва эстетик янгиликларни зўр бадиий маҳорат билан тасвир эта олганлар. Улар яратган асарлар неча асрлардан бери одамларни ҳаяжонлантириб, тўлқинлантириб келмоқда. Бунинг боиси шундаки, мазкур тангаларда халқимизнинг эстетик диди ва бадиий тафаккури ютуқлари ўз ифодасини топган.

САНЪАТ АСАРЛАРИНИ ҮРГАНИШДА ТАНГАЛАРНИНГ РОЛИ

Тангалар ўз замонасининг машҳур ҳайкалтарошлиари тўғрисида тасаввур берувчи, бутун ҳолда сақлашиб қолмаган ҳайкалларни қайта тиклашга ёрдамлашувчи

муҳим маиба ҳамдир. Юқорида қайд қилингап грек-бақтрия шоҳларининг тангаларига назар ташласак, шоҳ ва матбудаларининг расмлари юони ҳайкалтарошлиқ анъаналарига риоя қилишиб ишланганинг шоҳиди бўламиз. Бунинг сиро нимада? Гап шундаки, тангалардаги расмларни чизган рассом-кандакорлар ўзларига нусха сифатида, шубҳасиз, ўша даврдаги Бақтрия монументал тасвирий ва амалий санъатида мавжуд бўлған образлардан фойдаланганлар. Фикримизнинг ёрқин далили сифатида Грециянинг Магнесия деган шаҳаридан топилган Евтидемнинг ҳайкалини унинг тангадаги расми билан солиширайлик. Евтидем ҳайкали билан унинг тангалардаги расми ниҳоятда ўхшайдир. Бу ҳайкал милоддан олдинги III асрнинг охирларида тайёрланган бўлиб, у эллинистик ҳайкалтарошлиқининг эпиг чуқур реалистик анъаналарига риоя қилиб ишлангац. Мазкур ҳайкал Бақтрияда тайёрланган бўлиши керак. Унинг узоқ Магнесиядан топилишига сабаб шуки, Евтидем асли магнесиялик бўлган ва унинг ёшлиқ йиллари ўша ерда ўтган.

Тангалардаги расмларга қараганда грек-бақтрия шоҳлиги даврида Бақтриядаги кўпгина шаҳарлардаги сарой ва ибодатхоналарни машхур юони ҳайкалтароши Лисенпп (милоддан олдинги IV аср), Фидий (милоддан олдинги V аср), Пракситель (милоддан олдинги V аср) ва бошқаларининг кўпгина асарлари ёки уларнинг нусхалари безаб турган. Мисол учун Евтидем тангасининг орқа томонида тасвиirlаingan паҳлавон Геракл расмини олайлик. Геракл тангала қўлида ҳайвон териси ва сўйил ушлаб, тошда ўтирган ҳолда тасвиirlaingan. Бу Лисенппнинг «Дам олаётган Геракл» деб номланган асарига жуда ўҳшайди. Лисенппнинг яна бир асари — Зевс ҳайкали Гелиокл тангаларида тасвиirlaingan Зевсга айнаи ўҳшайди. Антимах тангаларида уч тишли айри ушлаб турган дengiz ҳудоси Посейдон эса Праксителнинг Мелосдаги Посейдон ҳайкалининг худди ўзгинасидир. Бундай мисолларни жуда кўп келтириш мумкин. Қизиги шундаки, бу ҳайкаллардан кўпининг асл нусхаси бизгача стнб келмаган. Мазкур тангаларнинг аҳамияти ҳам шундаки, улар бизга бу ҳайкаллар аслида қандай тасвиirlainganligi ҳақида тасаввур беради.

Күшонлар давридаги рассом-кандакорлар ҳам ўзларига нусха излаб, монументал санъатга мурожаат қилгаплар. Жумладан, эҳтимолдан холи эмаски, Холчайда (Сурхондарё) топилган ҳайкалларнинг баъзи-

лари ўз даврида Кушон шоҳи Герай тангаларини тай-
ёрлашда рассом-кандакор учун нусха вазифасини ўта-
ган. Нега деганда, бу ерда топилган Герай ҳайкали
унинг тангадаги расмига жуда ўхшайди. Матхурадан
топилган буюқ Кушон шоҳлари Вима Қадфиз ва Ка-
нишканинг ҳайкаллари ҳам уларнинг тангаларидаги
расмларига ўхшайди. Лекин бу иккала ҳайкалнинг бо-
ши сақланмаган. Бу борада бизга тангалар расмига қа-
раб, уларнинг боши қандай тасвиirlанганлигини би-
лиш мумкин. Шу ерда яна бир ажойиб мисолни айтиб
ўтиш керак. Бу Праксителнинг машҳур ҳайкалларидан
бири—1877 йилда Олимпиянинг Гера ибодатхонасида
топилган ёш Дионисни кўтариб турган Гермес ҳайка-
лининг асл нусхасидир. Мазкур ҳайкал Праксителнинг
қирққа яқин яратган асарларидан бизгача етиб келган
яккаю-ягона ҳайкалнинг асл нусхасидир. Унинг қол-
ган асарлари Рим нусхаларида маълум. Бу топилма ўз
даврида катта шов-шувга ва баҳсларга сабаб бўлди.
Ҳайкалнинг ўнг қўли синганлиги учун санъатшуносар
маъбуданинг бу қўли қандай ҳолатда тасвиirlанганли-
гини ва у нимани ушлаб турганлигини кўп вақтгача
аниқлай олмаган эдилар. Фракиянинг Алхила шаҳри-
дан топилган оддий бир танга маъбуданинг бу сирли
ҳолатини ойдинлаштириди. Таигада Гермес ўнг қўлида
бир бош узумни бўйи баландлигида кўтариб, ёш
Дионисга кўрсатиб турган ҳолатда тасвиirlанган
эди.

Тангалар бундан ташқари ҳайкалларнинг қачон ва
нима шарафига яратилганлигини ҳам айтиб бериши
мумкин. Лувр музейининг кўрки ҳисобланган ғалаба
маъбудаси Ника Самофракийскийнинг ҳайкали бу иуқ-
тай назардан жуда характерлидир. У қачон ва нима
шарафига яратилганлиги кўп вақтгача одамлар учун
муаммо бўлиб келар эди. Қарангки, муаммонинг жаво-
би тангада яширган экан. Македон шоҳи Деметрий
Полиаркет тангасининг топилиши бу саволларга жа-
воб берди. Таигада Луврдаги Ника маъбудасига ўхшаш
Ника кемада турган ҳолда тасвиirlанган эди. Деметрий
Полиаркетнинг қачон ҳукмронлик қилганлиги эса биз-
га ёзма манбалардан маълум. У милоддан олдинги IV
асрнинг охирларида ҳукмронлик қилган. Демак, ҳай-
ка ҳам шу даврда яратилган. Иккинчи саволга ҳам
мазкур тангасининг ўзи жавоб беради. Ҳайкал Деметрий



Евтидем тангасининг олд томони.

Архебия тангасининг олд томони.



а.
Деметрий тангасининг олд (а) ва орқа (б) томони.



Аминтас тангаларининг орқа томони.



Еукратид II тангасининг
олд томони.



Вима Кадфиз тангасининг олд томони



Канишка тангасининг олд томони



Васудева тангасининг олд томони.



Канишка ва Хувишка тангаларининг орқа томони.



Полиаркетнинг Саламин жангидаги (милоддан олдинги 306 йил) Птоломей I устидан ғалаба қозонганлиги шарадига тайёрланган.

ТАНГАЛАР ВА ДИН

Қадимги тангалар одамлар сиғиниб, улуғлаган маъбудларни, турли диний тасаввур ва эътиқодларнинг пайдо бўлишини, уларнинг тараққиёт йўлини ўрганишда муҳим роль ўйнайди. Маълумки, халқларнинг диний эътиқодларини ўрганиш катта илмий ва амалий аҳамиятга эга. Чунки дин тарихини яхши билиш диний идеологияга қарши курашда жуда кучли қурол бўлиб хизмат қиласди. Агар биз диний эътиқодларнинг шаклланишига назар ташласак, дунё динлари энг оддий диний эътиқодлардан пайдо бўлганлигининг шоҳиди бўламиз. Бу эса дин пешволарининг дин қадимдан мавжуд бўлган, деган даъволари нотўри, уйдирма эканлигини кўрсатади.

Қадимда шоҳлар ўз келиб чиқишини улуғлаш мақсадида ўзларини илоҳийлаштирганлар, ўзларини худонинг ердаги сояси, ноиби қилиб кўрсатганлар ва шутариқа одамларни эксплуатация қилиш учун диндан кенг фойдаланганлар. Бунинг учун улар турли воситаларни қўллашганлар. Хусусан, кўплаб ибодатхоналар қурдирганлар, санъатдан фойдаланганлар. Улар маъбудларнинг ҳайкалларини тайёрлатганлар, суратларини чиздирганлар ва ҳоказо. Жанубий Бақтрия территориясида жойлашган Ойхонум шаҳри ҳаробалари орасидан топилган юнон маъбуни Дионис ҳайкали, Дильтаржиидаги Геракл ҳайкали, Диоскурларнинг монументал расми ва бошқа шунга ўхшаш маъбудларнинг ҳайкаллари фикримизнинг далилидир. Ҳаммага маълумки, амалий ва тасвирий санъат инсон онгига кучли таъсир қилувчи бир қуролидир. Бу борада тангалар ҳам ҳоким синфларга жуда қўл келган. Чунки тангалар савдо-сотиқда муҳим айирбошлиш воситаси вазифасини бажарган ва одамлар орасида кенг тарқалган. Бу ҳол шоҳлар учун айни муддао эди. Улар бу энг осон ва шу билан бирга энг кучли ташвиқот қуролидан усталик билан фойдаланишган: тангаларнинг олд томонига ўз суратларини, орқа томонига маълум маъбуднинг суратини чиздиришган. Шу йўл билан улар ўзларини тарғиб қилганлар. Мусулмон мамлакатларида зарб қилинган тангаларда Қуръондан оятлар, шоҳнинг исми, ун-

вонлар, қачон ва қаерда мазкур танга зарб қилингани-
лиги қайд қилинган.

Саводли одамлар тангадаги ёзувларни ўқиганлар, саводсизлари эса расм ва ёзувларни томоша қилиш билан кифояланганлар. Лекин бундан қатъи назар, танга ўз вазифасини бажарган, яъни тангалардаги расм ва ёзувлар беихтиёр муомала давомида аста-секин инсон онгига сингиб борган.

Энди республикамиз территориясида топилган Күшон шоҳларининг тангалари мисолида қадимда Ўрта Осиё халқлари орасида улуғланган маъбуллардан баъзиларининг тангалардаги ифодаси ва улар билан боғлиқ бўлган диний тасаввурларини кўриб чиқайлик. Ёзма манбаларда бу маъбуллар ўзларида қандай диний тасаввурларини ифода этиши тўғрисида айрим маълумотлар бор. Лекин маъбулларнинг қандай тасвиirlанганлиги тўғрисида ҳеч қаерда ҳеч нарса зикр этилмаган. Шунинг учун ҳам бу борада тангалар асосий тарихий манба бўлиб хизмат қиласди.

Күшон шаҳаншоҳи Вима Қадфизнинг тангасида ҳиндларнинг бош маъбулларидан бири — шиддатли Шива муқаддас Наввос Нанди олдида тасвиirlанган. Маълумки Шива рақс, бўрон ва серпуштлик маъбути ҳам ҳисобланган. Ушбу тангада тасвиirlанган расм заминида қандай мазмун ётади? Гап шундаки, Ҳиндистонни Күшон шоҳларидан биринчи бўлиб Вима Қадфиз забт этган эди. У ўз ғалабасини ҳиндлар орасида мустаҳкамлаш ва уни янада ёйиш учун ҳиндлар маъбути Шивани ўзига ҳомий қилиб олган. Шу билан бирга унинг ғалабаларига Шива раҳнамолик қилганлигини қайд қилмоқчи бўлган. Вима Қадфиз шоҳлиги даврида Күшонлар салтанатининг пойтакти Ҳиндистон территорииясида бўлганлиги маълум.

Вима Қадфизнинг ўғли Канишка тангаларининг бирида Вадо, иккинчисида Михро, учинчисида Мах, Фарро ёки Орлагно каби зардуштийлар дини билан боғланган маҳаллий маъбулларнинг тасвири учрайди. Бу Канишка дин эркинлигини эътироф қилганлигини кўрсатувчи бир далилдир. Умуман Күшон шоҳларининг кўпчилиги, хусусан, Хувишка, шундай диний сиёsat ўтказганлар. Бу билан улар салтанат территорииясида яшаётган турли этник группага мансуб халқларни ўз таъсирида узоқ ушлаб қолмоқчи бўлганлар.

Канишка ва Хувишка тангаларида тасвиirlанган маъбуллар ўзларида қандай мазмунни ифодалайдилар?

Масалан, Михро Қуёш маъбути ҳисобланган. У тангаларда тиззагача тушган қалин чакмонда чапга қараб турган ҳолатда тасвиrlenган. Маъбуднинг ўнг қўли олдинга кўтариленган, чап қўли билан эса белини ушлаб турибди. Белида узун қилич, боши атрофида эса ёғду тасвиrlenган. Маъбуднинг сурати олдида унинг номи битилган. Ой маъбути Max бўлса, белида қилич, ўнг қўлида тож ушлаб турган ҳолда акс эттириленган. Маъбуднинг боши орқасида ярим ой тасвиrlenган. Олов, бойлик ва истиқбол маъбути Farro эса тангаларда чап томонга қараб турган ҳолда акс эттириленган. Унинг эгнида тиззагача тушган қалин чакмон, оёғида этик, чап қўли белида, ўнг қўлидаги ликопчада муқаддас олов ёниб турибди. Суратнинг орқасида «Farro» сўзи битилган.

Орлагно уруш маъбути ҳисобланган. Тангаларда у узун кийимда тасвиrlenган. Унинг боши ва елкаси атрофида ленталар ҳилпираб турибди. Маъбуднинг чап қўли белида, белида қилич, тепага кўтариленган ўнг қўлида эса найзани ушлаб турибди. Орқада «Орлагно» деб ёзилган.

Булардан ташқари Кушон шоҳларининг тангаларида яна бир қатор маҳаллий маъбудларнинг суратлари ҳам учрайди.

Кўриб турибмизки, бу маъбудларнинг ҳаммаси асосан самовий, табиат ҳодисалари, кучлари билан боғлиқ ва уларнинг инсон тассавуридаги ифодаси экан. Худди шу нарса зардуштийлар динининг моҳиятини ҳам белгилайди. Маълумки, зардуштийлар ер, ҳаво, сув ва оловни муқаддас ҳисоблаб, уларга сиғинганлар.

Агар мана шу тангалар бўлмаганда, биз бу маҳаллий маъбудларнинг номини, уларнинг қандай тасвиrlenанишини, нималарни ифодалашни билмас эдик. Кушонларгача бу маъбудлар одамлар қиёфасида тасвиrlenганни ёки йўқми, бизга қоронғидир. Ҳар қалай ҳозир бизда бу тўғрида аниқ маълумотлар йўқ. Балки маъбудларнинг одам қиёфасида тасвиrlenанишига мазкур территория Кушонлар салтанатига қўшиб олинниши натижасида вужудга келган сиёсий, ижтимоий ва ғоявий ўзгаришлар сабаб бўлгандир. Албатта, бунда юон маданиятининг таъсири ҳам роль ўйнаган бўлиши керак.

ҚАДИМИЙ ЯРОҒ-АСЛАҲАЛАР, ЁЗУВЛАР ВА ТИЛНИ ҮРГАНИШДА ТАНГАЛАРНИНГ РОЛИ

Курол-яроғлар тарихини ўрганишда тангалар жуда қимматли маълумотлар бериши мумкин. Айниқса, бу

нуқтаи назардан грек-бақтрия шоҳлари Деметрий II, Евкратиднинг, Евкратид II ва Кушон шоҳи Васудеванинг тангалари диққатга лойиқдир.

Масалан, Деметрий II тангасининг орқа томонида юнонларнинг уруш ва ғалаба маъбудаси Афина бир қўлида қалқон, иккинчи қўлида узун найзани ушлаб турган ҳолда тасвиrlenган. Евкратид I тангаларида узун найзалар билан қуролланган паҳлавон. Диоскурлар акс эттирилган. Евкратид II тангаларида Апполлон бир қўлида камон, иккинчи қўлида ўқ-ёй ушлаб турган ҳолда тасвиrlenган. Расмда ўқ-ёй ишларигача аниқ ифода этилган. Камон, найза ва қалқон ўша замон енгил суворийларининг, хусусан, бақтрияликларнинг ҳам яроғаслаҳаси ҳисобланган. Бақтрияликлар бу соҳада энг мерган бўлганлар.

Оғир қуролланган бақтриялик жангчилар ҳақида Кушон шоҳи Васудеванинг тангалари жуда яхши маълумот беради. Шоҳ тангада бошдан-оёқ совут кийган ҳолда тасвиrlenган. Шоҳнинг бошида ўзига хос темир қалпоқ, бўйни орқа томонидан махсус совут билан бекитилган. У тангачасимон пластинкали совут кийган. Белида узун тўғри қилич. Совут майда тангачасимон пластинкалардан тайёрланган. Бундай совут жангчиларнинг жанг қилишига, уларнинг эркин ҳаракат қилишига, унчалик халяқит бермаган. Ваҳоланки, олдинги даврдаги совутлар асосан катта пластинкалардан тайёрланганлиги учун жангчиларнинг ҳаракатини қийинлаштиради.

Тангадаги шоҳ қиличининг тасвирига қараганда бу даврга келиб, улар ҳам анча ўзгарганлигини кўрамиз. Васудевадан олдин ўтган Кушон шоҳларининг тангаларида тасвиrlenган қиличларнинг узунлиги ўртача, тифи кенг ва қалин бўлган. Бундай қиличлар жуда оғир бўлган. Табийки, бунда жангчилар тез ҳолдан тойғанлар. Васудеванинг қиличи эса узун ва тифи ингичка бўлган. Жангчи бундай қилич билан жанг қилаётганда тез чарчамаган ва эркин ҳаракат қилган. Демак, ҳунармандлар шундай металл таркибини кашф этганларки, ундан енгил ва жуда қулай қиличлар тайёрлаш мумкин бўлган. Аммо уларнинг мустаҳкамлиги, сифати олдинги қиличлардан ҳеч қолишмаган. Юқорида қайд қилинган қуроляроғлардан ташқари, Кушон шоҳларининг тангаларида гурзиларнинг расмини ҳам кўриш мумкин.

Рисоламизнинг бошида қайд қилганимиздек, тангалар қадимий ёзувларни ва тилларни ўрганишда ҳам маълум аҳамиятга эга. Авваламбор тангадаги ёзувлар

мазкур давлат территориясида яшовчи одамлар орасида хат-саводнинг пайдо бўлганлигидан далолат беради. Иккинчидан, тангалардаги ёзувларни палеографик ўрганиш асосида, ҳарфларнинг ёзилиши ўзгариб борганлигини кузатиш мумкин. Нихоят, учинчидан тангадаги ёзувлар қадимий ёзувларни ўқишида ҳам жуда катта ёрдам беради.

Олдимизда грек-бақтрия шоҳларининг Гелиокл тангаларига тақлид қилиб зарб қилинган, Герай ва Кудсула Кадфизнинг тангалари турибди. Улар хронологик тарзда қўйилган. Бу тангаларга диққат билан қаралса, улардаги ҳарфларнинг ёзилиш шакллари ўзгариб борганлигини кўрамиз. Бунинг ҳеч ажабланадиган жойи йўқ. Чунки грек-бақтрия подшолигининг тор-мор бўлиши, ҳокимиятнинг кўчманчи қабилалар қўлига ўтиши тангаларда, хусусан, улардаги ёзувларда ҳам ўз ифодасини топган эди. Грек-бақтрия шоҳларининг тангаларида ҳарфлар Грециянинг ўзида қандай ёзилса, бу ерда ҳам шундай ёзилган. Юнон подшолиги тор-мор этилиши билан бу тил ўз-ўзидан давлат тили бўлмай қолди. Вилоятининг асосий аҳолиси эса маҳаллий, бақтр тилида сўзлар эди. Юнон тили биринчи пайтларда бақтр тили билан рақобат қила олди. Лекин вақт ўтиши билан у бақтр тили билан рақобат қилолмай қолди. Нихоят буюк Кушон шоҳи Канишка ҳукмронлиги даврида бақтр тили давлат тилига айланди. Тангаларда бақтр тилида ёзилган сўзларининг пайдо бўлиши бундан гувоҳлик беради. Чунки бақтр тили давлат тили деб танилмагандан бундай ёзувлар тангаларда асло зарб қилинмасди. Канишка тангалари бўлмаганда ҳозир биз бу тўғрида ҳеч нарса билмаган бўлар эдик. Нега деганда бақтр тилида ёзилган сўзлар биринчи бўлиб Канишка тангаларида қайд қилинган. Бунда қизиги шундаки, бақтр тилини ифода этишда улар юнон алифбесидан фойдаланишган.

Машҳур совет олимни С. П. Толстов узоқ йиллар давомида қадимги Хоразм воҳасида олиб борган изланишлари давомида жуда кўп тангалар топган. У бу тангалардаги ёзувларни диққат билан ўрганиб, Хоразм тилини ифода этувчи 19 ҳарфни аниқлашга муяссар бўлди. Булар Хоразм алифбесининг бизга маълум бўлган биринчи ҳарфлари эди. Кейинчалик ҳарфларнинг ёзилиши ва ўқилишин асосида С. П. Толстов Тупроққалъадан топилган қадимги Хоразм тилида ёзилган ҳужжатларни ўқишига ҳаракат қилди ва бу борада анча муваффақиятларни қўлга киритди. Демак, бу қадимги Хоразм танга-

лари бўлмаганда, қадимги Хоразм тили ва ёзувини ўқиш жуда қийин бўларди.

Тангалардаги расмларга қараб қадимги одамлар қандай кийинганилиги, кийимларнинг бичими ҳақида оз бўлса ҳам тасаввур олиш мумкин. Бу борада Кушон шоҳларининг тангалари, айниқса эътиборга лойиқ. Бу тангалардаги шоҳ ва маъбудларнинг расмига қараб, Кушон даврида яшаган бобокалонларимизнинг кийимлари қандай бўлганлигини кўрамиз. Уларнинг бошларида кўпинча баланд телпак, эгнида яктакка ўхшаш ички кийим, унинг устида чакмон бўлган. Чакмоннинг узунлиги товонгача тушган. Айрим ҳоллардагина уларнинг этаги тиззадан сал пастда бўлган. Чакмоннинг ёқалари ва олди кўкрак бурма шаклида бўлган. Чакмонларнинг баъзилари қалин, баъзилари юпқароқ бўлган. Улар оёқларга чармдан тайёрланган юмшоқ этик кийиб юрганлар.

Хуллас, қарниб уч минг йиллик тарихи давомида тангалар қанчадан-қанча турли-туман воқеаларнинг шоҳиди бўлдилар: Буларнинг ҳаммаси уларда ўз аксини топди. Тангалар даврнинг ўзига хос кўзгусидир. Бу кўзгуда жамият, кишилар ҳаётида юз берган, ҳаттоки жуда сезиларли бўлмаган ўзгаришлар ҳам ўз ифодасини топган.

Ҳар йили республикамиз территориясида археологик қазишлар пайтида, қадимда одамлар яшаган ерларни қайта ўзлаштириш жараённида ёки тасодифан юзлаб-минглаб тангалар топилмоқда. Бу тангалар халқимизнинг кўп қиррали тарихи ва маданияти билан боғлиқ бўлган маълумотларни аниқлашда муҳим манба бўлиб хизмат қилмоқда. Улар асосида халқимизнинг тарихи, маданияти, ғоявий қарашлари ҳақидаги билимларимиз янада чуқурлашмоқда ва ойдинлашмоқда.

Шакирджан Пидаев

МОНЕТЫ — ЗЕРКАЛО
ЭПОХИ

На узбекском языке

Издательство «Узбекистан»—
1984, 700129, Ташкент, На-
вой, 30.

Редактор Б. Шарипов
Техредактор Т. Аббосов
Корректор С. Тоҳирова

ИБ № 3234

Теришга берилди 10.11.83. Босишга руҳ-
сат этилди 8.02.84. Р — 13535. Форма-
ти 84×108 $\frac{1}{3}2$. № 2 босма қозозига «Ли-
тературная» гарнитурада юқори босма
усулида босилди. Шартли босма лис-
ти 1,26. Шартли кр.-отт. 1,37. Нашр
листи 1,22. Тиражи 6781. Заказ № 2337.
Баҳоси 4 т.

«Ўзбекистон» нашриёти, 700129, Тош-
кент, Навоий кўчаси, 30. Нашр № 300—83.

Ўзбекистон КП Марказий Комитети
нашриётининг Меҳнат Қизил Байроқ
орденли босмахонаси, ГСП, Тошкент,
«Правда Востока», 26.